

BAB 4

Metodologi

Pendahuluan

Perkara yang dibincangkan dalam bab metodologi melibatkan reka bentuk kajian, pemilihan sekolah dan peserta kajian, teknik pengumpulan data, analisis data serta aspek kesahan dan kebolehpercayaan data. Prosedur pemilihan peserta kajian telah dirancang secara terperinci untuk memastikan mereka memenuhi syarat kajian yang telah ditetapkan. Ini adalah kerana peserta kajian diminta melakukan tugas kajian yang terdiri dari enam set tugas di mana melalui aktiviti melaksanakan tugasan inilah data dikumpul oleh pengkaji. Kaedah pembinaan tugas juga diuraikan secara terperinci. Ini diikuti dengan perbincangan tentang pelaksanaan kajian rintis bersama enam peserta kajian yang telah dilakukan oleh pengkaji. Dalam hal ini, didapati banyak prosedur yang telah dirancang telah ditukar apabila pengkaji dapat mengesan masalah yang terpaksa dihadapi semasa berada di lapangan. Analisis data juga dibuat berdasarkan dapatan yang diperoleh melalui sebahagian daripada kajian rintis yang telah dilakukan dalam tempoh masa tujuh bulan. Berdasarkan kajian rintis yang dilakukan, pengkaji telah melakukan kajian lapangan yang sebenar berpandukan prosedur yang telah diperbaiki serta dipertingkatkan keberkesanannya. Dapatan awal yang diperolehi menunjukkan peningkatan dari segi kejelasan objektif kajian yang bertujuan untuk mengkaji strategi dan prestasi kognitif peserta kajian di peringkat STM dan LTM serta perubahan strategi kognitif di kedua-dua peringkat tersebut.

Reka Bentuk Kajian

Mengikut Creswell (2005, 2008), kajian merupakan suatu proses yang melibatkan beberapa langkah yang digunakan oleh pengkaji untuk mengumpul dan memproses data bagi meningkatkan kefahaman tentang permasalahan yang dikaji, dan proses penyiasatan dalam sesuatu kajian itu perlu dilakukan secara sistematik. Reka bentuk kajian pula merupakan suatu perancangan dalam melaksanakan sesuatu kajian itu, bermula daripada soalan kajian sehingga kepada jawapan dan kesimpulan terhadap permasalahan yang dikaji (Yin, 2003). Reka bentuk kajian juga ditakrifkan sebagai perancangan pengkaji tentang cara pelaksanaan kajian berkenaan (Bogdan & Biklen, 2007).

Memandangkan kajian ini memerlukan pengkaji mendalam pemikiran peserta kajian, maka kajian ini telah menggunakan teknik pengumpulan data secara kualitatif. Pendekatan ini memerlukan pengkaji bertindak sebagai instrumen dengan bantuan tugas *Cognitive Strategies and Performance* (Cosp) yang telah disediakan, kajian dan data yang diperoleh di lapangan, pengumpulan dan analisis data dilakukan secara induktif, dan seterusnya laporan kajian yang terperinci dikemukakan (Merriam, 2009). Kaedah interview, pemerhatian dan analisis dokumen digunakan sebagai teknik pengumpulan data. Pemerhatian mendalam dilakukan terhadap setiap pergerakan serta tingkah laku dan perkataan yang dinyatakan oleh peserta kajian. Terdapat keadaan di mana pengkaji perlu menyoal peserta kajian secara mendalam untuk membantu mereka memberikan penjelasan bagi setiap maksud jawapan yang diberi, serta menjelaskan tingkah laku peserta kajian yang didapati mempunyai maksud yang tersirat dan memerlukan pengesahan peserta kajian. Pengendalian kajian berpandukan tugas pula dilakukan secara individu dan reaksi peserta kajian dirakam menggunakan perakam video bagi setiap tugas dan interview yang dilakukan selepas setiap sesi pembelajaran.

Selepas interviu, peserta kajian diminta meluangkan sedikit masa untuk mencatat proses yang berlaku semasa pembelajaran sama ada secara dalaman atau luaran di dalam jurnal mereka bagi membolehkan pengkaji memahami strategi kognitif yang digunakan daripada perspektif peserta kajian. Kaedah yang digunakan untuk mengkaji dan memahami satu fenomenon, proses atau pandangan dari perspektif mereka yang dikaji ini dikenali sebagai kaedah generik qualitatif (Merriam, 1998, 2001). Kaedah ini juga sebenarnya menggunakan sebahagian teknik yang digunakan dalam kajian etnografi, kajian kes, *grounded theory* dan kajian tindakan. Kaedah generik kualitatif yang bersifat fleksibel dalam menerangkan berbagai jenis fenomena dalam pendidikan menyebabkan lebih ramai menggunakan (Merriam, 1999).

Teknik Pengumpulan Data

Kajian yang berasaskan kaedah generik kualitatif ini menggunakan teknik pengumpulan data melalui interviu terbuka, pemerhatian dan analisis dokumen. Ketiga-tiga teknik ini digunakan bertujuan untuk menghasilkan huraian lengkap dan terperinci berkaitan kajian yang dilakukan supaya matlamat kajian difahami oleh pembaca.

Interviu

Teknik interviu dilakukan sebaik sahaja teknik pemerhatian selesai dan merupakan teknik utama digunakan untuk memperolehi data. Interviu dilakukan serta merta disebabkan pengkaji perlu mengetahui atau memahami setiap pergerakan yang dilihat serta perkataan yang dipertuturkan. Protokol interviu separa berstruktur dapat membantu pengkaji baru atau *novice researcher* bagi tujuan melancarkan sesi interviu. Protokol juga penting memandangkan setiap peserta kajian melakukan tugasan

sebanyak enam kali. Melalui protokol yang disediakan, didapati interviu lebih berfokus kepada tugas yang diberi (lihat Lampiran A di m.s. 227). Walau bagaimanapun, dari segi penggunaan strategi kognitif oleh murid, setiap persoalan yang dikemukakan bergantung kepada perkara yang dilihat dan didengar oleh pengkaji semasa pemerhatian.

Pemerhatian

Teknik pengumpulan data yang kedua digunakan bagi menyokong data interviu adalah teknik pemerhatian. Semasa pemerhatian, setiap persoalan yang timbul disebabkan perlakuan serta perbuatan peserta yang menimbulkan tanda tanya dalam pemikiran pengkaji dicatatkan. Apa yang ditanya adalah berdasarkan apa yang dilihat dan didengar semasa pemerhatian. Catatan perlu bagi mengelakkan pengkaji mengemukakan persoalan berdasarkan andaian dalam pemikirannya sendiri dan bukannya berdasarkan apa yang berlaku. Bagi mengelakkan kehilangan data, perakam video juga digunakan untuk membantu pengkaji melihat serta mengkaji semula dapatan sekiranya timbul kecaburan dan kekeliruan dalam menginterpretasi data. Protokol pemerhatian tidak digunakan dalam kajian ini memandangkan pemerhatian hanya dilakukan ke atas tingkah laku peserta kajian semasa membuat tugas.

Dokumen

Dua jenis dokumen digunakan dalam kajian ini iaitu jurnal peserta kajian dan jurnal pengkaji.

Jurnal Peserta Kajian

Jurnal peserta kajian adalah catatan yang dibuat oleh peserta kajian selepas setiap kali tugas diberi. Jurnal peserta kajian juga dikategorikan sebagai bukti dokumen dan banyak membantu dalam mengukuhkan dapatan hasil daripada interviu dan pemerhatian. Jurnal peserta kajian penting memandangkan setiap perkataan yang dicatatkan merupakan luahan serta pandangan peserta kajian sendiri terhadap strategi yang digunakan, cara strategi digunakan dan faktor yang menyebabkan mereka menggunakan strategi tersebut. Contoh catatan jurnal peserta kajian ditunjukkan dalam Lampiran B (m.s. 228).

Jurnal Pengkaji

Jurnal pengkaji merupakan catatan pemerhatian serta refleksi yang ditulis oleh pengkaji pada setiap kali kajian dijalankan. Terdapat ruangan khas dalam jurnal tersebut yang dilabel sebagai pemerhatian oleh pengkaji. Catatan pengkaji penting memandangkan data bagi kajian berbentuk kualitatif sepatutnya bersifat kontekstual iaitu pandangan hanya merujuk kepada *setting* yang ditetapkan dan konteks yang perlu diteksturkan oleh pengkaji sahaja. Kajian menggunakan kaedah generik kualitatif ini bermatlamat untuk memperoleh dapatan dari perspektif peserta kajian mengenai perkara yang dikaji yang dirujuk sebagai *emic perspective* oleh Merriam (2009). Oleh itu, pengkaji telah membezakan dengan jelas catatan hasil daripada dapatan bersama peserta kajian dengan catatan berdasarkan refleksi pengkaji. Contoh catatan jurnal pengkaji ditunjukkan dalam Lampiran C (m.s. 231). Catatan terperinci jurnal pengkaji juga digunakan sebagai *audit trail* memandangkan fokus isi kandungan yang dicatatkan dalam jurnal tersebut adalah berkisar kepada keseluruhan perjalanannya kajian.

Pemilihan Sekolah dan Peserta Kajian

Sekolah yang dipilih untuk kajian ini adalah sebuah sekolah yang terletak di kawasan bandar. Walau bagaimanapun, taraf sosio ekonomi murid adalah pelbagai iaitu terdapat murid yang berasal dari keluarga berada dan pendidikan tinggi, keluarga yang sederhana dan keluarga berpendapatan dan berpendidikan rendah. Sekolah yang dipilih telah mendapat kebenaran dan kelulusan daripada Bahagian Perancangan dan Penyelidikan Dasar Pendidikan, Kementerian Pelajaran Malaysia (lihat Lampiran D di m.s. 235).

Peserta kajian telah dipilih menggunakan prosedur persampelan terpilih berdasarkan kriteria berikut:

- a. Peserta kajian terdiri daripada satu kelas Tingkatan Empat.
- b. Peserta kajian terdiri daripada mereka yang berada dalam kelas yang berbeza tetapi diajar oleh guru kimia yang sama. Peserta kajian yang diajar oleh guru yang sama memperoleh maklumat yang setara berkaitan dengan setiap topik yang diajar dalam mata pelajaran kimia.
- c. Peserta kajian adalah heterogenous iaitu mereka terdiri daripada sekurang-kurangnya tiga kumpulan murid yang berbeza pencapaian dalam mata pelajaran kimia iaitu kumpulan yang berpencapaian tinggi, sederhana dan rendah.
- d. Peserta kajian bersedia untuk menjadi peserta sehingga kajian selesai.

Selain memenuhi kriteria utama tersebut, murid yang dipilih untuk dijadikan peserta kajian telah dipastikan mempunyai sikap tanggungjawab, mempunyai komitmen tinggi dan mendapat kebenaran daripada ibu, bapa atau penjaga untuk menyertai kajian ini (Lampiran E di m.s. 236). Kriteria ini bertujuan untuk

mengelakkan berlakunya situasi di mana mereka menarik diri sedangkan kajian belum tamat dengan sepenuhnya. Pada peringkat pertama, semua murid dalam satu kelas yang dipilih telah diberikan satu tugas *Cognitive Performance task* (Copt) tentang pengetahuan asas kimia terutama yang berkaitan dengan Jadual Berkala Unsur (Lampiran F di m.s. 237). Murid kemudiannya, dikelaskan kepada tiga kumpulan berdasarkan pencapaian mereka dalam ujian yang telah dijalankan itu.

Jadual 4.1

Prosedur Pemilihan Peserta Kajian

Kategori pencapaian murid dalam mata pelajaran kimia	Skor	Bilangan murid keseluruhan	Bilangan peserta kajian
Peserta kajian berpencapaian tinggi	70-100	10	2
Peserta kajian berpencapaian sederhana	50-69	14	2
Peserta kajian berpencapaian rendah	0-49	16	2
Jumlah	40		6

Pada peringkat kedua, enam orang murid telah dipilih sebagai peserta kajian. Mereka seterusnya dibahagikan kepada tiga kategori iaitu dua peserta kajian berpencapaian tinggi, dua peserta kajian berpencapaian sederhana dan dua peserta kajian berpencapaian rendah. Jadual 4.1 menunjukkan cara peserta kajian dipilih untuk kajian ini. Peserta kajian dikategorikan sebagai berpencapaian tinggi apabila skor tugas mereka adalah di antara 70 hingga 100. Peserta kajian berpencapaian sederhana mendapat skor di antara 50 hingga 69, manakala peserta kajian berpencapaian rendah dipilih apabila skor yang diperolehi kurang daripada 50. Kategori pencapaian ini

dibuat berdasarkan gred yang telah ditetapkan oleh sekolah di mana kajian dilaksanakan. Dua peserta kajian dari setiap kategori dipilih bagi tujuan mengkaji perbezaan strategi dan prestasi kognitif merentasi peserta kajian yang mempunyai pelbagai pencapaian. Bilangan ini sudah mencukupi kerana berdasarkan kajian rintis pengkaji telah menggunakan bilangan peserta kajian yang sama bagi setiap kategori dan didapati data yang diperolehi telah mencapai ketepuan. Bilangan peserta kajian yang sedikit juga sesuai untuk kajian kualitatif disebabkan kajian dilakukan secara mendalam (Creswell, 2003).

Tugasan Kajian

Tugasan disediakan untuk peserta kajian bagi membantu pengkaji mengumpul data dalam mendapatkan jawapan kepada setiap soalan kajian yang dikemukakan dalam bab pertama. Tugasan yang disediakan terbahagi kepada tiga kategori yang dibincangkan secara terperinci.

Tugasan Pertama

Tugasan pertama yang dilabelkan *Cosp-1* digunakan untuk tujuan persampelan. Murid telah diberitahu bahawa markah bagi tugas ini juga digunakan oleh pihak sekolah sebagai sebahagian daripada ujian bulanan. Kaedah ini penting untuk memastikan murid menjawab dengan lebih bersungguh-sungguh. Secara tidak langsung, tugas ini telah dapat meningkatkan kualiti dapatan kerana ia menggambarkan pengetahuan sedia ada yang sebenar pada murid.

Tugasan pertama diberi kepada murid selepas tamat pengajaran yang melibatkan tiga topik pertama dalam mata pelajaran kimia Tingkatan Empat sukan

KBSM. Topik tersebut ialah ‘*Introduction to chemistry*’, ‘*The structure of the atom*’ dan ‘*Chemical formulae and equations*’. Semua soalan yang terdapat dalam tugasan ini mempunyai kaitan dengan unsur yang terdapat dalam jadual berkala. Terdapat 30 soalan objektif dan tiga soalan struktur. Aspek kesahan bagi tugasan pertama ini telah ditentukan terlebih dahulu dengan merujuk kepada pakar mata pelajaran kimia (*subject matter expert*) sebelum diedarkan pada peserta kajian yang terlibat dengan kajian ini.

Tugasan Kedua

Dalam peringkat kedua kajian, enam set tugasan telah digunakan. Setiap satu tugasan mengandungi tiga lampiran seperti yang diringkaskan dalam Jadual 4.2. Semua tugasan mengandungi item yang berkaitan dengan konsep asas kimia. Tugasan ini mula diberi selepas selesai pengajaran topik pertama hingga topik keempat. Secara lebih terperinci, keenam-enam set tugasan dilabelkan sebagai Cosp-1A, Cosp-1B, Cosp-1C, Cosp-2A, Cosp-2B, Cosp-2C, Cosp-3A, Cosp-3B, Cosp-3C, Cosp-4A, Cosp-4B, Cosp-4C, Cosp-5A, Cosp-5B, Cosp-5C dan Cosp-6A, Cosp-6B dan Cosp-6C. Singkatan Cosp merujuk kepada *Cognitive Strategy and Performance*. Tugasan Cosp-1A, Cosp-2A, Cosp-3A, Cosp-4A, Cosp-5A dan Cosp-6A bertujuan untuk mengetahui pengetahuan sedia ada peserta kajian terhadap senarai konsep kimia yang diuji. Pengetahuan sedia ada perlu dikenal pasti kerana ianya memberi kesan terhadap prestasi kognitif peserta kajian di peringkat STM dan LTM sebagaimana yang dipersoalkan dalam soalan kajian dua dan empat. Selain pengetahuan sedia ada, konsep asas penting yang harus difahami serta diingati oleh peserta kajian bagi membolehkan mereka mempelajari topik kimia lain yang lebih sukar juga dikaji melalui tugasan Cosp-1B, Cosp-2B, Cosp-3B, Cosp-4B, Cosp-5B dan Cosp-6B. Melalui tugasan ini, pengkaji dapat mengenal pasti strategi kognitif peserta kajian di peringkat STM.

Seterusnya, tugasan Cosp-1C, Cosp-2C, Cosp-3C, Cosp-4C, Cosp-5C dan Cosp-6C diberi untuk mengetahui prestasi kognitif peserta kajian di peringkat STM. Tempoh masa dua puluh minit yang diperuntukan adalah berasaskan kajian rintis yang telah dijalankan di mana tempoh ini didapati sudah mencukupi untuk peserta kajian memahami serta mengingati konsep asas kimia yang diberi.

Jadual 4.2

Huraian Ringkas Tugasan Kedua

Tugasan kedua	Huraian ringkas mengenai tugasan
Cosp-1A Cosp-1B Cosp-1C (Lampiran G1, m.s. 248)	Tugasan pengetahuan sedia ada peserta kajian berkaitan Cosp-1B. Senarai nama dan formula bagi 20 unsur pertama jadual berkala mengikut urutan menaik nombor proton. Tugasan berkaitan maklumat yang peserta kajian berjaya pindahkan ke peringkat STM berdasarkan Cosp-1B.
Cosp-2A Cosp-2B Cosp-2C (Lampiran G2, m.s. 251)	Tugasan pengetahuan sedia ada peserta kajian berkaitan Cosp-2B. Simbol dan kedudukan bagi 40 unsur penting dalam jadual berkala. Tugasan berkaitan maklumat yang peserta kajian berjaya pindahkan ke peringkat STM berdasarkan Cosp-2B.
Cosp-3A Cosp-3B Cosp-3C (Lampiran G3, m.s. 254)	Tugasan pengetahuan sedia ada peserta kajian berkaitan Cosp-3B. 40 nama dan simbol ion monoatom penting yang digunakan dalam pengajaran dan pembelajaran. Sembilan daripada ion monoatom tersebut mempunyai lebih daripada satu cas. Tugasan berkaitan maklumat yang peserta kajian berjaya pindahkan ke peringkat STM berdasarkan Cosp-3B.
Cosp-4A Cosp-4B Cosp-4C (Lampiran G4, m.s. 257)	Tugasan pengetahuan sedia ada peserta kajian berkaitan Cosp-4B. Cosp-4B mengandungi dua bahagian: Bahagian pertama terdiri daripada 13 nama dan simbol bagi kation yang berlainan cas. Bahagian kedua terdiri daripada 9 nama dan simbol bagi anion berlainan cas. Tugasan berkaitan maklumat yang peserta kajian berjaya pindahkan ke peringkat STM berdasarkan Cosp-4B.
Cosp-5A Cosp-5B Cosp-5C	Tugasan pengetahuan sedia ada peserta kajian berkaitan Cosp-5B. Cosp-5B mengandungi 14 nama dan formula bagi ion poliatom yang berlainan cas. Tugasan berkaitan maklumat yang peserta kajian berjaya pindahkan ke

(Lampiran G5, peringkat STM berdasarkan Cosp-5B.
m.s. 260)

Cosp-6A	Tugasan pengetahuan sedia ada peserta kajian berkaitan Cosp-6B.
Cosp-6B	Cosp-6B mengandungi dua bahagian iaitu: Bahagian pertama: Siri Kereaktifan Logam yang terdiri daripada 11 nama dan formula logam mengikut urutan. Bahagian kedua: Siri Elektrokimia yang terdiri daripada 12 nama dan formula kation serta 7 nama dan formula anion mengikut urutan.
Cosp-6C	Tugasan berkaitan maklumat yang peserta kajian berjaya pindahkan ke (Lampiran G6, peringkat STM berdasarkan Cosp-6B. m.s. 263)

Tugasan Ketiga

Selepas tempoh empat minggu tamat, strategi dan prestasi kognitif peserta kajian telah dinilai sekali lagi menggunakan tugasan yang ketiga. Tugasan ketiga merupakan gabungan kesemua enam set tugasan dari tugasan kedua yang dipermudahkan (lihat Lampiran G7, m.s. 269). Tugasan ketiga bertujuan untuk mengenal pasti strategi dan prestasi kognitif yang digunakan oleh peserta kajian dalam pembelajaran konsep asas kimia di peringkat LTM.

Pembinaan Tugasan

Tugasan dibina berdasarkan analisis yang dilakukan ke atas kertas soalan peperiksaan Sijil Pelajaran Malaysia dan juga merujuk kepada isi kandungan buku teks kimia Tingkatan Empat.

Analisis kertas peperiksaan Sijil Pelajaran Malaysia.

Pembinaan tugas ini pada umumnya melibatkan dua kaedah asas. Pertama, menganalisis buku teks iaitu pengkaji meneliti perkataan dan frasa berpandukan Buku Teks Kimia Tingkatan Empat bagi memperoleh maklumat yang mengaitkannya dengan Jadual Berkala Unsur. Kedua, pengkaji melakukan analisis soalan peperiksaan Sijil Pelajaran Malaysia (SPM) dari tahun 1996 sehingga tahun 2006 bagi mengenal pasti konsep serta maklumat yang sepatutnya murid kuasai sepanjang tempoh pembelajaran. Berdasarkan maklumat tersebut, tugas yang bertujuan untuk mengkaji penggunaan strategi kognitif murid dihasilkan.

Berikut merupakan satu contoh cara analisis dilakukan terhadap soalan SPM bagi mengenal pasti konsep asas yang harus difahami dan diingat oleh murid bagi membolehkan mereka menyelesaikan masalah kimia yang lebih sukar.

Contoh: SPM 2003, Kertas 2

Berdasarkan Rajah 2, jawab soalan-soalan berikut.

Soalan(a): Apakah unsur yang diwakili oleh simbol Fe?

Jawapan: Ferum.

Ulasan: Soalan memerlukan murid mengingati nama serta simbol unsur-unsur penting dalam Jadual Berkala Unsur.

Soalan (b): Pada Rajah 2, tandakan ‘X’ dalam petak-petak bagi semua unsur peralihan.

Ulasan: Soalan ini memerlukan murid mengingati atau mempunyai gambaran kedudukan logam peralihan dalam Jadual Berkala Unsur. Ini menunjukkan kedudukan dan nama kumpulan dalam Jadual Berkala Unsur yang murid harus ingat.

Soalan (c): Nyatakan satu ciri istimewa bagi unsur peralihan.

Jawapan: Mempunyai warna.


Ulasan: Soalan ini memerlukan murid mengingati ciri-ciri istimewa bagi unsur peralihan. Walaupun jawapan boleh diberi jika murid menghafal tetapi soalan ini bukan merupakan satu konsep tetapi merupakan pernyataan dan tidak begitu diberikan tumpuan dalam kajian ini.

Soalan (d): Tuliskan susunan elektron bagi atom Mg.

Jawapan: 2.8.2.

Ulasan: Soalan ini memerlukan kemampuan murid mengaitkan susunan elektron dengan kumpulan dan kala (kefahaman) tetapi perkara asas yang perlu murid hafal ialah petala pertama mempunyai maksima dua elektron, petala kedua mempunyai lapan elektron dan seterusnya.

Soalan (e) (i): Tuliskan persamaan kimia bagi tindak balas antara aluminium dengan gas oksigen.



Ulasan: Walaupun soalan ini lebih kompleks dan memerlukan pengetahuan dan kefahaman yang mendalam, namun pengetahuan asas yang perlu murid ingat ialah simbol bagi aluminium dan simbol bagi gas oksigen. Dan untuk menulis formula hasil tindakbalas dengan betul, murid perlu ingat cas bagi ion aluminium iaitu Al^{3+} dan ion oksida iaitu O^{2-} .

Soalan (e) (ii): Nyatakan secara ringkas pemindahan elektron yang berlaku dalam pembentukan ikatan antara aluminium dan oksigen.

Jawapan: Dua atom aluminium mendermakan tiga elektron masing-masing manakala tiga atom oksigen masing-masing menerima dua elektron yang didermakan untuk membentuk sebatian ionik yang stabil.

Ulasan: Soalan (e) (ii) memerlukan kepakaran murid menggambarkan susunan elektron dalam sesuatu atom dan ion.

Gas Helium
. ringan
. tidak reaktif
. tidak berwarna

Gas Hidrogen
. ringan
. mudah terbakar
. tidak berwarna

Soalan (f): Berdasarkan maklumat di atas, gas yang manakah lebih sesuai digunakan dalam belon kaji cuaca? Berikan satu sebab.


Jawapan: Helium. Gas helium bersifat ringan dan lengai.

Ulasan: Jawapannya memerlukan logik dan tidak melibatkan hafalan.

Berdasarkan penelitian, didapati konsep seperti jirim, unsur, sebatian, atom dan molekul bukan sahaja mempunyai perkaitan secara tidak langsung dengan Jadual Berkala Unsur, malah ianya merupakan suatu pengetahuan asas yang boleh membantu murid memahami unsur-unsur yang terdapat dalam jadual berkala.

Analisis buku teks

Analisis buku teks juga digunakan dan dihadkan kepada empat topik yang pertama dalam buku teks kimia Tingkatan Empat. Sebagai contoh, apabila merujuk bab 2 buku teks kimia (Kementerian Pelajaran Malaysia, 2003), murid diperkenalkan kepada konsep jirim seperti yang ditunjukkan dalam Rajah 4.1. Sebagaimana yang dijelaskan dalam rajah tersebut, jirim dibahagi kepada dua iaitu unsur dan sebatian. Unsur pula dikategorikan kepada atom dan molekul manakala sebatian diklasifikasikan kepada molekul dan sebatian. Apabila diteliti, didapati Al (aluminium) dan Pb (plumbum) mempunyai kaitan langsung dengan Jadual Berkala Unsur, manakala contoh bagi molekul iaitu O₂, N₂, CO₂, H₂O mempunyai kaitan secara tidak langsung dengan konsep yang sedang dikaji. Begitu juga contoh sebatian iaitu NaCl yang didapati menunjukkan perkaitan yang begitu ketara.




Rajah 4.1. Peta konsep jirim.

Pengetahuan murid tentang jirim, unsur, sebatian, atom dan molekul merupakan pengetahuan asas kepada topik Jadual Berkala Unsur yang merupakan faktor yang membantu pengkaji menyediakan soalan bagi setiap tugas

Prosedur Pentadbiran Tugasan

Semua peserta kajian diberi penerangan berkaitan dengan objektif kajian sebelum kajian sebenar dilakukan. Kajian ini dilakukan untuk mengkaji strategi kognitif yang digunakan oleh peserta kajian dan menentukan prestasi kognitif yang ditunjukkan semasa pembelajaran kimia. Pengkaji telah mengambil masa tiga minggu untuk membina hubungan baik dengan peserta kajian supaya mereka merasa selesa serta tidak teragak-agak untuk berkongsi pengalaman dalam menyatakan setiap perkara yang mereka fikirkan semasa pembelajaran berlangsung.

Prosedur pentadbiran tugasan adalah seperti yang diringkaskan dalam Rajah 4.2 (m.s. 83). Tugasan pertama adalah terdiri daripada soalan berkaitan dengan tajuk *Introduction to Chemistry, Atomic Structure* dan *Chemical Bonding*. Ketiga-tiga tajuk berkenaan dijangka mengambil masa tiga bulan untuk diajar, yang merangkumi bulan Januari, Februari dan Mac. Tugasan kedua yang terdiri dari enam set tugasan ditadbir secara berperingkat. Set pertama yang terdiri dari tugasan Cosp-1A, Cosp-1B, Cosp-1C dan Cosp-2A, Cosp-2B, Cosp-2C bertujuan untuk menguji konsep yang dipelajari oleh murid dalam tajuk *Periodic Table and Elements* yang dijangka selesai diajar pada bulan April. Tugasan Cosp-3A, Cosp-3B, Cosp-3C merupakan tugasan yang menguji kemampuan peserta mengingat senarai ion monoatom yang mempunyai satu cas dan senarai ion monoatom yang mempunyai lebih daripada satu cas. Peserta kajian mula didedahkan pada simbol bagi ion monoatom melalui tajuk *Chemical Formulae and Equations* dan *Chemical Bonding*. Tugasan ini ditadbir selepas sesi pengajaran berkaitan kedua-dua tajuk berkenaan selesai iaitu pada bulan Jun. Tugasan Cosp-4A, Cosp-4B, Cosp-4C merupakan senarai kation dan anion yang harus diingat oleh murid dan banyak digunakan semasa pembelajaran berkaitan dengan *Chemical Bonding*,



Rajah 4.2. Ringkasan Pentadbiran Tugasan dan Masa Pelaksanaan Pengumpulan Data Kajian.

Electrochemistry, Acid and Bases dan *Salts*. Tugasan ini telah ditadbir oleh pengkaji sebaik saja tajuk *Chemical Bonding* selesai diajar. Tugasan Cosp-5A, Cosp-5B dan

Cosp-5C pula menguji murid dalam mengingati beberapa formula bagi ion poliatom. Senarai ion ini banyak digunakan dalam tajuk *Acid*, *Base* dan *Salt*. Seterusnya tugasan Cosp-6A, Cosp-6B, Cosp-6C yang diperkenalkan melalui tajuk *Electrochemistry* juga digunakan dalam beberapa topik penting di peringkat tingkatan lima. Tugasan ini telah ditadbir sebaik saja selesai pengajaran pada bulan September.

Kajian Rintis

Kajian rintis mempunyai kelebihan yang tersendiri dalam memastikan kajian yang dijalankan mempunyai elemen kebolehpercayaan yang tinggi. Kesesuaian tugasan juga dapat dinilai terutamanya dari aspek bahasa kerana bahasa yang digunakan perlu sesuai dan mudah difahami oleh peserta kajian. Tugasan yang digunakan dalam kajian rintis ini juga perlu dapat mencungkil setiap persoalan kajian bagi memastikan tugasan yang serupa boleh digunakan dalam pengumpulan data sebenar. Melalui kajian rintis ini, kesesuaian prosedur pentadbiran tugasan telah diperbaiki sebelum kajian sebenar dilakukan. Pengkaji juga dapat membiasakan diri dengan teknik serta prosedur interview serta dapat menganggarkan masa yang diperlukan dalam interview yang sebenar. Sebarang pembetulan atau idea baru yang lebih sesuai dapat dikesan melalui kajian rintis ini. Secara umumnya, melalui kajian rintis, pengkaji mendapat respons awal mengenai maklumat yang mungkin mereka peroleh daripada peserta kajian dalam kajian sebenar. Hasil yang diperoleh daripada kajian rintis membolehkan pengkaji merancang cara untuk mengkategorikan data. Data yang dikategori dibentangkan supaya lebih sistematik serta dapat difahami oleh pembaca. Kajian rintis dilakukan beberapa kali sehingga tidak ada lagi pembetulan yang perlu dilakukan terutama yang membabitkan tugasan, teknik serta prosedur kajian.

Pada peringkat awal, tugasan pertama ditadbir bertujuan untuk melakukan persampelan terpilih. Tiga kelas Tingkatan Empat aliran sains telah digunakan dalam kajian rintis. Seterusnya enam murid digunakan dalam kajian rintis untuk melihat kebolehpercayaan tugasan kedua. Nama peserta kajian rintis diringkaskan kepada BG, HZ, FH, SZ, TH dan SN. Abjad yang dipilih merupakan singkatan daripada nama asal murid bagi tujuan memudahkan pengkaji mengenal pasti dengan cepat peserta kajian apabila melihat singkatan nama tersebut. Semua murid yang dipilih sebagai peserta kajian memenuhi syarat yang ditetapkan pada awal kajian. Keenam-enam peserta kajian mempunyai pencapaian yang berbeza iaitu dua peserta kajian dikategorikan sebagai berpencapaian tinggi, dua berpencapaian sederhana dan dua berpencapaian rendah. Kajian rintis yang menggunakan tempat yang sama mempunyai kelebihan dari segi metodologi. Mengikut Yin (1994), “*the work at the pilot sites can provide information about relevant field questions and about the logistics of the field inquiry*” (m.s. 75). Kajian rintis dilakukan dengan menggunakan semua tugasan yang seterusnya digunakan dalam kajian yang sebenar. Pengkaji telah cuba mematuhi secara terperinci semua prosedur semasa pentadbiran. Penskoran sebahagian tugas juga telah dilakukan berdasarkan dapatan kajian rintis. Pengkaji telah mencatatkan setiap perkara yang berkaitan dengan prosedur kajian semasa kajian rintis dilakukan bagi tujuan membantu pengkaji meneruskan kajian dengan satu kaedah yang lebih sistematik dalam kajian sebenar. Kaedah yang sistematik serta teratur penting memandangkan pengkaji dan peserta mempunyai tugas lain yang perlu diutamakan selain daripada melakukan kajian ini. Ringkasan catatan dari kajian rintis ini seterusnya dilabelkan sebagai jurnal pengkaji dalam kajian yang sebenar. Jurnal pengkaji menunjukkan catatan berkaitan hari, tarikh, masa, nama peserta kajian, tajuk tugas, catatan pemerhatian dan refleksi pengkaji terhadap kajian. Jurnal pengkaji yang digunakan bagi tujuan refleksi telah banyak membantu pengkaji mengenal pasti kekuatan serta kelemahan kajian semasa

dan selepas kajian lapangan dijalankan. Berdasarkan refleksi, penambahbaikan kaedah kajian telah dapat dilakukan. Berdasarkan jurnal pengkaji, satu jadual yang lebih teratur telah dihasilkan yang digunakan sebagai panduan untuk kajian sebenar. Semua enam peserta kajian juga telah diberikan satu jurnal oleh pengkaji. Mereka diminta mencatatkan perkara penting yang berkaitan dengan strategi kognitif yang telah mereka gunakan dalam menyiapkan tugas semasa kajian sebenar. Catatan ini adalah sebahagian daripada data yang digunakan dalam melakukan triangulasi dengan data interviu yang dirakamkan menggunakan perakam audio dan data pemerhatian yang dirakamkan menggunakan perakam video. Sebelum kajian rintis dilakukan, pengkaji telah memberi arahan supaya peserta kajian membuat catatan terperinci strategi yang mereka telah gunakan semasa sesi mengingat menggunakan tugas Cosp. Walau bagaimanapun, melalui pemerhatian pengkaji dalam kajian rintis, didapati sebahagian besar data yang diperoleh daripada jurnal peserta kajian terkeluar daripada fokus kajian. Oleh itu, dalam kajian sebenar, pengkaji telah memberikan garis panduan yang lebih jelas serta bertulis tentang kandungan jurnal peserta kajian. Selepas setiap kali kajian dilakukan, peserta kajian dikehendaki mencatatkan hari, tarikh, masa, tajuk tugas yang diberi serta catatan umum. Kandungan jurnal peserta kajian yang seterusnya adalah berfokuskan kepada perkara-perkara berikut:

- Apa yang perlu peserta kajian ingat.
- Bagaimana peserta kajian mengingat? Apa strategi yang telah digunakan?
- Adakah strategi yang digunakan oleh peserta kajian itu berkesan? Jika ya, kenapa?
Jika tidak, kenapa?
- Untuk jangka panjang, adakah strategi kognitif ini dikekalkan?
(jika strategi ditukar, sila catatkan strategi yang baru).
- Komen peserta kajian terhadap tugasan.

Format terperinci jurnal peserta kajian adalah seperti Lampiran C.

Pemantapan Tugasan

Melalui kajian rintis, pengkaji telah dapat mengenal pasti beberapa kesilapan item tugasan yang digunakan. Jadual 4.3 menunjukkan beberapa contoh kesilapan dan pembetulan yang telah dilakukan.

Jadual 4.3

Contoh Pembetulan Sebahagian Tugasan Cosp-4B

Tugasan asal		Pembetulan pertama Tugasan cosp-4B		Pembetulan kedua Tugasan cosp-4B	
<u>Name of cations</u>	<u>Formula of cations</u>	<u>Name of cations</u>	<u>Formula of cations</u>	<u>Name of cations</u>	<u>Formula of cations</u>
<i>Beryllium</i>	Be^{2+}	<i>Ion Beryllium</i>	Be^{2+}	<i>Beryllium ion</i>	Be^{2+}
<i>Cesium</i>	Cs^+	<i>Ion Cesium</i>	Cs^+	<i>Cesium ion</i>	Cs^+
<i>Zinc</i>	Zn^{2+}	<i>Ion Zinc</i>	Zn^{2+}	<i>Zinc ion</i>	Zn^{2+}
<i>Barium</i>	Ba^{2+}	<i>Ion Barium</i>	Ba^{2+}	<i>Barium ion</i>	Ba^{2+}
<i>Aluminum</i>	Al^{3+}	<i>Ion Aluminum</i>	Al^{3+}	<i>Aluminum ion</i>	Al^{3+}

Jadual 4.3 menunjukkan beberapa kesilapan atau kelemahan tugasan yang dapat dikesan oleh pengkaji semasa kajian rintis. Pada tugasan asal, perkataan ion tidak ditulis menyebabkan peserta kajian terkeliru dengan atom. Menyedari kesilapan tersebut, pengkaji telah memperbaiki item dalam tugasan dengan meletakkan perkataan ion di depan nama setiap elemen. Walau bagaimanapun, selepas kajian diteruskan lagi, pengkaji menyedari bahawa nama seperti ‘ion beryllium’ digunakan untuk versi Bahasa Melayu namun untuk versi Bahasa Inggeris ia sepatutnya ditulis sebagai ‘beryllium ion’.

Bagi anion pula terdapat perbezaan antara nama elemen berbanding dengan nama ion. Sebagai contoh, atom flourin akan menjadi ion flourin apabila atom tersebut menerima satu elektron, tetapi bagi versi bahasa Inggeris ‘flourine atom’ akan menjadi ‘fluoride ion’ apabila atom menerima satu elektron. Terdapat perubahan dari segi nama yang digunakan, yang kadang kala tidak disedari oleh pengkaji dan guru yang mengajar

mata pelajaran kimia di sekolah. Perbezaan antara nama atom dan ion tidak berlaku dalam kes kation. Sebagai contoh, ‘zinc atom’ akan menjadi ‘zinc ion’ apabila ia menderma dua elektron.

Jadual 4.4

Contoh Pembetulan Sebahagian Tugasan Cosp-4B

Tugasan asal		Pembetulan pertama Tugasan Cosp-4B		Pembetulan kedua Tugasan Cosp-4B	
<u>Name of anions</u>	<u>Formula of anions</u>	<u>Name of anions</u>	<u>Formula of anions</u>	<u>Name of anions</u>	<u>Formula of anion</u>
Fluorine	F^-	<i>Ion Fluorine</i>	F^-	<i>Fluoride ion</i>	F^-
Chlorine	Cl^-	<i>Ion Chlorine</i>	Cl^-	<i>Chloride ion</i>	Cl^-
Bromine	Br^-	<i>Ion Bromine</i>	Br^-	<i>Bromide ion</i>	Br^-
Nitride	N^{3-}	<i>Ion Nitride</i>	N^{3-}	<i>Nitride ion</i>	N^{3-}
Oxide	O^{2-}	<i>Ion Oxide</i>	O^{2-}	<i>Oxide ion</i>	O^{2-}
Peroxide	O_2^{2-}	<i>Ion Peroxide</i>	O_2^{2-}	<i>Peroxide ion</i>	O_2^{2-}

Jadual 4.4 menunjukkan kesilapan yang sama iaitu dari segi penamaan ion. Masalah yang timbul antaranya disebabkan oleh pengaruh penggunaan nama-nama tersebut semasa pengajaran dan pembelajaran dilakukan dalam Bahasa Melayu. Walaupun bahasa perantaraan bagi pengajaran dan pembelajaran kimia pada tahun 2006 dilakukan dalam Bahasa Inggeris, namun kebiasaan menyebut nama tersebut dalam versi Bahasa Melayu masih sukar diatasi.

Antara kebaikan lain yang diperoleh apabila kajian rintis dilakukan ialah terdapat keadaan di mana peserta kajian tidak memahami arahan atau persoalan yang dikemukakan. Oleh itu, pengkaji mengubah serta menggunakan perkataan yang lebih mudah, sesuai dengan pengetahuan yang ada pada murid. Apa yang agak

membanggakan pengkaji ialah wujud juga situasi di mana peserta kajian menyedari kesilapan yang dilakukan oleh pengkaji terutama dari segi penggunaan terminologi kimia. Satu fenomena yang harus dihadapi sebagaimana yang dinyatakan oleh Gilbert Highet melalui puisinya yang bertajuk '*The Art of Teaching*' yang ditulis pada tahun 1950.

“Whenever there are beginners and experts, old and young, there is some kind of learning going on, and some sort of teaching. We are all pupils and we are all teachers”.

(Forum English Teaching, October 2003)

Apa yang penting dalam mencari ilmu pengetahuan ialah kesedaran guru atau seseorang pengkaji untuk meletakkan dirinya seperti murid, kerana mereka juga mempelajari sesuatu daripada murid.

Jadual 4.5 (m.s. 90) merupakan contoh asal tugas Cosp-5B. Tugasan ini terdiri daripada 34 ion poliatom yang murid perlu ingat dalam tempoh 20 minit kajian. Semasa kajian rintis dilakukan, pengkaji mendapati peserta kajian mengalami kesukaran untuk mengingati nama-nama yang jarang mereka jumpa. Selain itu, bilangan item adalah banyak berbanding dengan tempoh masa yang diberi. Bilangan item yang banyak menyebabkan peserta kajian kelihatan tertekan serta tidak bersemangat untuk berusaha mengingati nama serta formula ion poliatom yang diberi. Situasi seperti ini juga boleh menimbul kesukaran kepada pengkaji untuk menganalisis strategi kognitif yang peserta kajian gunakan.

Oleh itu satu tugas Cosp-5B yang baru disediakan. Tugasan ini mempunyai bilangan item yang bersesuaian dengan peruntukan masa. Selain itu, nama ion yang dipilih ialah ion yang kerap digunakan semasa sesi pengajaran dan pembelajaran

sahaja. Tugasan yang telah diperbaiki selepas pengumpulan maklumat semasa kajian rintis ialah seperti yang ditunjukkan dalam Jadual 4.6 (m.s. 90-91).

Jadual 4.5

Contoh Asal Tugasan Cosp-5B

<i>Ions with a 1- charge</i>			<i>Ions with a 2- charge</i>	<i>Ions with a 3- charge</i>	<i>Ions with a 1+ charge</i>
Acetate CH_3COO^-	Perbromate BrO_4^-	Cyanide CN^-	Carbonate CO_3^{2-}	Phosphite PO_3^{3-}	Ammonium NH_4^+
Bicarbonate or hydrogen carbonate HCO_3^-	Hypochlorite ClO^-	Thiocyanate SCN^-	Chromate CrO_4^{2-}	Phosphate PO_4^{3-}	Hydronium H_3O^+ the acid ion
Bisulfate or hydrogen sulfate HSO_4^-	Chlorite ClO_2^-	Hydroxide OH^-	Dichromate $\text{Cr}_2\text{O}_7^{2-}$		
Dihydrogen phosphate H_2PO_4^-	Chlorate ClO_3^-	Permanganate MnO_4^-	Hydrogen phosphate HPO_4^{2-}		
Dihydrogen phosphite H_2PO_3^-	Perchlorate ClO_4^-	Nitrite NO_2^-	Sulfite SO_3^{2-}		
Hypobromite BrO^-	Hypoiodate IO^-	Nitrate NO_3^-	Sulfate SO_4^{2-}		
Bromite BrO_2^-	Iodate IO_3^-	Hydroxide OH^-	Thiosulfate $\text{S}_2\text{O}_3^{2-}$		
Bromate BrO_3^-	Periodate IO_4^-				

Jadual 4.6

Contoh Pembetulan Tugasan Cosp-5B

Polyatomic Ions <i>Memorize the common polyatomic ions according to the right charge</i>			
<i>Ions with a 1- charge</i>	<i>Ions with a 2- charge</i>	<i>Phosphite ion</i> PO_3^{3-}	<i>Ammonium ion</i> NH_4^+
Manganate (VII) ion MnO_4^-	Carbonate ion CO_3^{2-}	Phosphate ion PO_4^{3-}	Hydronium ion H_3O^+ the acid ion
Nitrite ion NO_2^-	Chromate ion CrO_4^{2-}		

<i>Nitrate ion</i> NO_3^-	<i>Dichromate ion</i> $Cr_2O_7^{2-}$		
<i>Hydroxide ion</i> OH^-	<i>Sulphite ion</i> SO_3^{2-}		
	<i>Sulphate ion</i> SO_4^{2-}		
	<i>Thiosulphate ion</i> $S_2O_3^{2-}$		

Tugasan Cosp-5B hanya terdiri daripada 14 ion poliatom sahaja. Bilangan yang bersesuaian ini membolehkan peserta kajian mempunyai masa yang cukup untuk memahami dan mengingati nama serta formula yang diberikan. Masa yang cukup perlu memandangkan nama ion poliatom jarang peserta kajian dengar serta susah untuk diingat. Selain itu, peserta kajian juga kerap keliru disebabkan sebutan nama yang hampir sama seperti *nitrite ion* dan *nitrate ion*, *chromate ion* dan *dichromate ion* dan *sulphite ion*, *sulphate ion* dan *thiosulphate ion*. Begitu juga dengan formula yang digunakan adalah hampir sama, perbezaan hanya dari segi bilangan atom dalam sesuatu ion poliatom dan juga cas ion keseluruhan. Tugasan yang lebih ringkas ini menyebabkan murid tidak merasa kesuntukan masa untuk menggunakan strategi kognitif yang boleh membantu mereka mengingati nama serta simbol ion tersebut.

Dapatan Kajian Rintis

Berdasarkan kajian rintis yang telah dijalankan, pengkaji dapat mengetahui sama ada tugasan dan prosedur yang digunakan dapat menjawab persoalan yang dikemukakan dalam bab satu. Berikut adalah sebahagian daripada analisis data berdasarkan dapatan daripada kajian rintis. Berdasarkan interviu yang ditranskrip secara verbatim, pengkaji telah menyenaraikan semua strategi kognitif yang digunakan oleh peserta kajian. Pada peringkat awal, strategi kognitif dikelaskan kepada dua iaitu strategi kognitif eksternal dan strategi kognitif internal.

Strategi kognitif BG berdasarkan tugas Cosp 4B.

Petikan di bawah menunjukkan strategi yang digunakan oleh peserta kajian, BG, untuk menghafal nama atau simbol kation dan juga cas bagi setiap kation. BG menggunakan strategi *rehearsal* berserta dengan strategi *chunking*. Kedua-dua strategi ini dikategorikan sebagai strategi kognitif internal berdasarkan ungkapannya yang berbunyi '*I recite it in my mind 3 by 3*'. Ini disokong oleh rakaman video yang menunjukkan BG tidak menggerakkan langsung bibir atau mengeluarkan suara semasa sesi pengumpulan data dilakukan. Berikut adalah sebahagian daripada interviu antara pengkaji dan BG.

- BG: *OK, after that I recite it in my mind 3 by 3.*
RC: *'3 by 3'. What do you mean by '3 by 3'?*
BG: *Like Beryllium, Cesium, Zinc, than **BAR** Barium, Aluminium and Rubidium, **PCC** –Potassium, Calcium and Cadmium.*
*LSMHS, in here I memorize by using the first alphabet word like **Look So Many Hot Silver.***
RC: *Don't you think it is difficult? For example PCC, may be you can remember PCC but you don't know what it stands for...*
BG: *It's OK, because I recite it a few times.*
RC: *How about the charges?*
BG: *Quite simple just like I recite it one, two times than I remember already.*

(Petikan transkrip interviu kajian rintis)

Secara lebih spesifik, strategi pengelompokan yang digunakan oleh peserta kajian merupakan pengelompokan satu senarai yang terdiri daripada empat belas nama kepada empat unit yang terdiri daripada kelompok tiga, tiga, tiga dan lima. Kelompok tiga, tiga, tiga dan lima mewakili *Beryllium, Cesium, Zinc, BAR, PCC* dan *LSMHS*. Kemudian strategi kognitif yang disebut sebagai strategi akronim digunakan seperti *BAR* yang mewakili barium, aluminium dan rubidium. Seterusnya, akronim *PCC* mewakili *Potassium, Calcium* dan *Cadmium*. Bagi kelompok yang mengandungi lima

huruf, BG menggunakan strategi akrostik iaitu "Look So Many Hot Silver". Strategi akrostik bertujuan membantu peserta kajian mengingati nama bagi *lithium*, *sodium*, *magnesium*, *hydrogen* dan *silver*. Walau bagaimanapun, kesalahan ketara BG ialah mengabaikan perkataan ion bagi setiap nama yang disebut.

Strategi kognitif peserta kajian BG berdasarkan tugas Cosp 2B.

BG agak konsisten dengan strategi yang digunakan. Strategi yang konsisten dapat diperhatikan semasa sesi interview berpandukan tugas Cosp-2B di mana peserta kajian sepatutnya mengingat formula 40 unsur berserta kedudukan unsur tersebut di dalam Jadual Berkala Unsur.

BG: Platinum, Aurum and this one is mercury. I just remember it as P.A.H.

RC: PAH?

BG: Platinum(Pt), Aurum(Au), Mercury(Hg).

RC: Just now I saw you writing something using your finger (laugh), what does it mean?

*BG: Sometimes if you practice writing using pen and paper it is quite wasting right? So I just **imagine** write things.*

RC: How about this paper, I see two sets of 'periodic table' without the 'table', just the elements. Why do you do like this?

*BG: I **imagine** the position and I just write, that's all.*

(Petikan transkrip interview kajian rintis)

Berdasarkan ungkapan "*I just remember it as PAH*" menunjukkan BG menggunakan strategi akronim untuk mengingat tiga unsur iaitu *Platinum (Pt)*, *Aurum (Au)*, dan *Mercury (Hg)*. Di samping itu, BG juga menggunakan strategi *visual imagery* di mana peserta kajian ini dapat melihat benda yang disebut dalam fikirannya. Ini berasaskan dua ungkapan yang berbunyi "*So I just imagine write things*" dan "*I imagine the position and I just write*". Penggunaan strategi *visual imagery* juga dapat

diperhatikan daripada cara peserta kajian menulis susunan elemen pada kertas yang diconteng semasa melakukan proses mengingat.

PERIODIC TABLE OF THE ELEMENTS																		
	G 1	G 2	G 3	G 4	G 5	G 6	G 7	G 8	G 9	G 10	G 11	G 12	G 13	G 14	G 15	G 16	G 17	G 18
P 1	H																	He
P 2	Li	Be											B	C	N	O	F	Ne
P 3	Na	Mg	← Transition metals →										Al	Si	P	S	Cl	Ar
P 4	K	Ca			V	Cr	Mn	Fe		Ni	Cu	Zn					Br	Kr
P 5	Rb				Mo						Ag	Cd					I	Xe
P 6	Cs									Pt	Au	Hg						Rn
P 7																		

Rajah 4.3(a). Jadual Berkala Unsur yang diberi kepada Peserta Kajian.

H																	
Li	Be																
Na	Mg	V	Cr	Mo	Fe	Ni	Cu	Zn									
K	Ca		Mo				Ag	Cd									
Rb							Pt	Au	Hg								
Cs																	

Rajah 4.3(b). Jadual Berkala Unsur yang ditulis oleh peserta kajian.

Rajah 4.3(a) merupakan tugas Cosp-2B yang menunjukkan formula bagi 40 unsur yang terdapat dalam Jadual Berkala Unsur. Rajah tersebut juga menunjukkan kedudukan sebenar unsur tersebut dalam Jadual Berkala Unsur. Rajah 4.3(b) pula merupakan lakaran yang ditulis oleh peserta kajian semasa cuba mengingat tugas yang diberi. Lakaran menunjukkan penggunaan strategi kognitif luaran yang dapat dilihat dengan jelas oleh pengkaji semasa pemerhatian. Jurnal peserta kajian pula menunjukkan penggunaan strategi kognitif dalaman iaitu strategi ulangan. Ini

berdasarkan catatan '*I recite them in my mind for about 3 to 4 times*'. Kemudian peserta kajian menggunakan strategi yang dinamakan sebagai penilaian (Kwong, 1994) berdasarkan catatan '*I ask myself questions*'. Satu lagi bukti yang menunjukkan penggunaan strategi *visual imagery* yang diceritakan oleh peserta kajian semasa interview juga dapat dikesan dalam jurnal peserta kajian. Bukti yang dimaksudkan ialah apabila peserta kajian BG membuat catatan yang berbunyi "*I picture the table in my mind*". Petikan menunjukkan sebahagian daripada catatan yang terdapat dalam jurnal peserta kajian.

'I recite them in my mind for about 3 to 4 times. I ask myself questions. I picture the table in my mind. I felt it was very easy to kognitise this task as I am already familiar with the periodic table of elements.'

(Petikan Jurnal BG)

Strategi kognitif peserta kajian SZ berdasarkan tugas Cosp 4B.

Analisis seterusnya adalah berdasarkan strategi yang ditunjukkan oleh peserta kajian, SZ, semasa menggunakan tugas Cosp-4B iaitu memahami dan mengingati nama, simbol serta cas bagi kation dan anion. Semasa menggunakan tugas tersebut, peserta kajian tidak dikehendaki mengingati senarai tersebut mengikut urutan yang ditetapkan oleh pengkaji. Peserta kajian dibenarkan menukar susunan jika itu dapat membantu meningkatkan aktiviti kognitif mereka. Petikan di bawah menunjukkan SZ menggunakan strategi kognitif luaran iaitu strategi yang dapat dilihat dengan jelas semasa proses pembelajaran.

- SZ: Saya cari yang bercas 1+ dulu, yang 1+ yang tak ada *highlighter*. Dah ingat yang tu, pergi yang cas dua, yang bercas 2+ *highlighter colour* kuning.
RC: Yang bercas 2+ *highlighter colour* kuning.
SZ: Yang bercas 3 + *highlighter colour* pink, satu aje.
RC: Yang 3 *colour* pink.

(Petikan transkrip interview kajian rintis)


Penggunaan strategi kognitif luaran oleh SZ dilakukan dengan menggunakan *highlighter* yang berlainan warna untuk mengelaskan ion mengikut cas masing-masing. Ion yang berasas 2+ ditanda dengan *highlighter* berwarna kuning, ion berasas 3+ ditanda dengan *highlighter* berwarna merah jambu dan ion berasas 1+ tidak diwarnakan. Seterusnya strategi penyusunan dan ulangan digunakan apabila peserta kajian menghafal simbol dan cas bagi ion mengikut urutan bermula dengan ion berasas 1+, 2+ dan 3+. Strategi ini dinyatakan oleh peserta kajian semasa interviu dan dapat diperhatikan juga daripada rakaman video.

Prosedur Pentadbiran Kajian Sebenar

Terdapat tiga bahagian utama dalam prosedur pentadbiran data dalam kajian sebenar. Bahagian pertama adalah proses pemerhatian oleh pengkaji yang melakukan rakaman video dan juga interviu dengan menggunakan perakam audio. Bahagian kedua pula adalah proses yang telah dilalui oleh peserta kajian yang perlu menyelesaikan tugas berpandukan tugas Cosp-1A selama 5 minit, tugas Cosp-1B selama 20 minit, tugas Cosp-1C selama 5 minit dan diinterviu selama 30 minit atau lebih. Kedua-dua proses dilalui oleh pengkaji dan peserta kajian secara serentak, manakala bahagian ketiga menunjukkan cara bukti yang diperoleh dari tugas Cosp-1A telah diringkaskan, catatan pemerhatian telah dicatatkan secara lebih lanjut dan transkrip interviu diringkaskan. Semua aktiviti ini telah membolehkan pengkaji menghasilkan satu laporan daptan berdasarkan tugas Cosp-1A, Cosp-1B dan Cosp-1C.

Rajah 4.4 menunjukkan bagaimana laporan bagi peserta kajian pertama yang dilabelkan sebagai peserta kajian berpencapaian tinggi 1 diperoleh berdasarkan enam set tugas. Seramai enam peserta kajian telah melalui prosedur kerja yang sama. Di akhir kajian, pengkaji telah memperolehi enam laporan kes. Analisis antara setiap kes

telah dilakukan bagi melihat penggunaan strategi kognitif dalam pembelajaran berkaitan dengan Jadual Berkala Unsur. Seterusnya analisis penggunaan strategi kognitif antara murid yang berbeza pencapaian dilakukan.



Rajah 4.4. Laporan peserta kajian berpencapaian tinggi berdasarkan tugas Cosp.

Penganalisisan Data

Data yang diperoleh melalui interview ditranskrip secara verbatim dan setiap pernyataan peserta kajian yang berkaitan dengan objektif kajian dikodkan. Seterusnya pernyataan yang dikodkan dikelompokkan mengikut kategori yang bersesuaian. Tema

kajian dapat diperoleh berdasarkan kategori yang diasingkan dan perbincangan dilakukan bertujuan menjawab setiap persoalan kajian. Penganalisisan data dilakukan dengan bantuan Perisian Nvivo 7. Pengurusan dan proses analisis data yang terperinci diberikan pada Lampiran H (m.s. 270), Lampiran I (m.s. 274) dan Lampiran J (m.s. 277).

Kesahan dan Kebolehpercayaan

Elemen kesahan dan kebolehpercayaan penting dalam kajian yang menggunakan pendekatan generik kualitatif. Beberapa prosedur telah dilakukan bagi meningkatkan elemen kesahan dan kebolehpercayaan kajian.

Kesahan Kandungan Tugasan

Kesahan isi kandungan tugasan secara keseluruhannya telah dilakukan oleh lima orang pakar dalam bidang pendidikan sains kimia. Mereka terdiri daripada dua guru kimia yang berpengalaman (*subject matter expert - SME*) dan seorang pensyarah, dalam bidang kimia (juga SME) bagi memastikan tidak berlakunya kesilapan istilah atau miskonsepsi dalam persoalan yang dikemukakan. Mereka juga menyemak kandungan enam set tugasan Cosp di peringkat kajian rintis dan juga kajian sebenar. Semua komen dan cadangan daripada SME terutama setelah kajian rintis dilakukan, diintegrasikan ke dalam dalam enam tugasan Cosp yang digunakan di peringkat kajian sebenar. Dua orang guru Bahasa Inggeris juga diminta membuat penelitian bagi memastikan bahasa yang digunakan tepat, ringkas serta mudah difahami oleh peserta kajian.

Kebolehpercayaan tugas

Kebolehpercayaan kajian dilakukan melalui kajian rintis dan triangulasi data. Tugasan yang sama ditadbirkan dua kali menggunakan murid yang bukan terdiri daripada peserta kajian sebenar. Semasa kajian rintis, pembetulan juga dilakukan secara berperingkat terutama dari aspek isi kandungan tugas serta arahan yang diberi. Pengkaji juga menggunakan kaedah triangulasi bagi data interview dan data pemerhatian dari rakaman video bagi mengesahkan pemerhatian yang dilakukan, terutama jika perkara yang diperhatikan berkait dengan perlakuan peserta kajian yang kabur. Pengkaji sentiasa bertanya kepada peserta kajian apa saja data yang tidak jelas sama ada data interview atau data pemerhatian bagi membolehkan peserta kajian memuktamadkan semua pemerhatian dan pemahaman pengkaji terhadap perkara yang diperhatikan. Data daripada jurnal peserta kajian juga digunakan untuk menyemak dan mengesahkan perkara yang diperhatikan. Pandangan pakar sentiasa dirujuk dalam proses mengkodkan data serta mengelaskan pernyataan peserta kajian mengikut kategori yang sesuai. Dalam konteks kajian ini, penyelia telah bertindak sebagai pakar kerana beliau mengajar kaedah penyelidikan dan banyak membuat kajian yang bersifat kualitatif. Dengan cara ini, pengkaji sentiasa dapat menjaga elemen kebolehpercayaan terhadap data yang dikumpul.

Rumusan

Secara umum, beberapa prosedur telah dilakukan bagi mengkaji strategi kognitif yang digunakan oleh peserta kajian semasa kajian dijalankan. Pemilihan peserta kajian adalah berdasarkan syarat yang ditetapkan, dan prosedur pemilihan peserta kajian juga telah diuraikan secara terperinci. Pembinaan tugas adalah

berdasarkan beberapa kriteria yang bersesuaian dengan matlamat kajian. Tugasan yang dibina dipastikan mempunyai elemen kesahan serta kebolehpercayaan. Satu kajian rintis telah dilakukan menggunakan enam peserta kajian dalam kalangan murid Tingkatan Empat yang memilih mata pelajaran kimia sebagai salah satu mata pelajaran elektif. Kajian rintis dilakukan bertujuan untuk melihat *feasibility* apabila kajian sebenar dilakukan. Selain itu, kesesuaian tugasan yang digunakan serta kesesuaian prosedur pentadbiran tugasan juga dapat dikenal pasti. Kajian sebenar juga menggunakan enam peserta kajian dalam kalangan murid tingkatan empat dari sekolah yang sama. Pengkaji telah memastikan peserta kajian bersedia serta mendapat persetujuan daripada penjaga untuk terlibat dalam kajian ini. Satu surat kebenaran telah diberikan kepada penjaga yang mengandungi matlamat, prosedur dan sebab kajian dilakukan. Semua perkara di atas telah diterangkan dengan jelas kepada penjaga. Peserta kajian telah diberi penerangan tentang prosedur dan telah dilatih tentang teknik untuk memperkenalkan strategi kognitif yang digunakan semasa melakukan tugas dan semasa interviu. Kajian berkaitan strategi kognitif dimulakan dengan melaksanakan tiga set tugas yang pertama sehinggalah tiga set tugas yang ke enam. Kajian tersebut dirakam menggunakan perakam audio serta perakam video. Pengkaji juga telah melatih peserta kajian menulis jurnal yang lebih berfokus dan bersesuaian dengan objektif kajian. Perisian Nvivo-7 telah digunakan bagi membantu pengkaji menganalisis data dalam kajian yang sebenar.